

大方廣佛華嚴經普賢行願品別行疏鈔卷第十四

唐圭峯草堂寺沙門宗密隨疏鈔

△疏六利益願。

經我於一切諸有中。所修福智恆無盡。定慧方便及  
解脫。獲諸無盡功德藏。一塵中有塵數刹。一一刹有  
難思佛。一一佛處眾會中。我見恆演菩提行。

△疏願於一切時恆作利益眾生事業無空過。故亦  
名三業不空願。

鈔第六我於下二偈明利益願。彼第九也。疏三業

不空者。彼經總相標云。願乘不退輪。四不退中行。

菩薩行。身語意業悉不唐捐。

△疏前偈修福智等為不空因。獲無盡藏是不空果。

鈔前偈至不空果者。此一偈中。二句是因。一句是果。

△疏謂暫見身則必定佛法。暫聞音聲則得實智慧。纔生淨信則永斷煩惱。得如大藥王樹身。得如如意寶身。名功德藏。

鈔謂暫見身至如意寶身者。除謂一字全是彼經文也。論科為二。一從見身至斷煩惱名作業不空。二業能安樂故謂見身行。知佛法真實故云必

定聞口說法。能生智慧。念意實德。諸惑不生。此但增勝而說三業成益不同。實則互有二。謂得如大下。名利益不空。二喻皆喻拔苦也。一切眾生有二種苦。一種種諸苦。謂逼迫等。若身若心。藥王治之。出現品云。譬如雪山有藥王樹。名曰善見。若有見者。眼得清淨。若有聞者。耳得清淨。若有嗅者。鼻得清淨。若有嘗者。舌得清淨。若有觸者。身得清淨。若有眾生取彼地土。亦能為作除病利益。佛子。如來應正等覺。無上藥王。亦復如是。能作一切饒益。眾生。若有得見如來色身。眼得清淨。若有得聞如來

名號耳得清淨若有得躡如來戒香鼻得清淨若有得嘗如來法味舌得清淨具廣長舌解語言法若有得觸如來光者身得清淨究竟獲得無上法身若於如來生憶念者則得念佛三昧清淨若有眾生供養如來所經土地及塔廟者亦具善根滅除一切諸煩惱患得賢聖樂佛子我今告汝設有眾生見聞於佛業障纏覆不生信樂亦種善根無空過者乃至究竟入於涅槃也一貧窮苦世財法財如意治之言得如意寶身者此即出現品明十身相中第十相名如如意寶身故彼經云復次佛

子譬如大海有大如意摩尼寶王名一切世間莊嚴藏具足成就百萬功德隨所住處令諸眾生災患消除所願滿足然此如意摩尼寶王非少福眾生所能得見如來身如意寶王亦復如是名為能令一切眾生皆悉歡喜若有見身聞名讚德悉令永離生死苦患假使一切世界一切眾生一時等心欲見如來悉令得見所願皆滿佛子佛身非是少福眾生所能得見唯除如來自在神力所應調伏若有眾生因見佛身便種善根乃至成熟為成熟故乃至得見如來身耳佛子是為如來身第十

相即兼前如大藥王樹身並喻佛身以塵沙功德積集成故名功德藏論主對前安樂此為利益故作此釋也實則藥王喻三業捨惡離苦如意喻三業進善得樂疏名功德藏者疏和上經文結成此經獲諸無盡功德藏之句也。

△疏後偈利益時處謂徧於時處求能益法利眾生故十地經云願乘不退輪修菩薩行今見諸佛演菩提行即乘教誠輪修菩薩行故。

△疏七轉法輪願。

經普盡十方諸刹海。一一毛端三世海。佛海及與國

土海我徧修行經劫海。一切如來語清淨。一言具眾音聲海。隨諸眾生意樂音。一流佛辯才海。三世一切諸如來於彼無盡語言海。恆轉理趣妙法輪。我深智力普能入。

△疏亦名攝法上首願謂轉佛法輪願皆攝取而轉授故。

鈔第七普盡下三偈轉法輪願彼第三願也。

△疏文中初偈轉法輪處若據有修行之言者。合屬前段為修行處前已有處此中音譯及興善本皆無修行。故屬此段。

鈔轉法輪處者彼經有四節。一轉處。二轉時。三攝法方便。四轉法頓周。今即初也。彼經云。願一切世界佛興於世。佛應現之世界。則是轉法輪處。疏若據有修行至故屬此段者。通伏難也。難云。此偈雖標刹海。而結云。我徧修行。應屬前段。云何判屬法輪願中。通釋如疏也。

△疏次一偈能轉圓音。

鈔次一偈能轉圓音者。如香山國師通敘十解。一云。如來在日。一音演暢。隨類解生。二云。或以隨方之音。皆謂世尊同其已語。三或云。唯出隨根。

音聞者各聞。稱根別法。四或云。唯出隨法。一音聞者各得所聞。別法。五或云。於佛胸中有淨大種功德。最勝能發清淨梵音聲相。六或云。有一無心之音。若佛有心。其音即定。不能徧應一切眾音。如凡夫等。以佛無心。定出一音。故能普應一切眾音。其猶谷響及眾樂器。但有心者。出種種聲。七或云。唯一圓徧之音。都無宮商平上之異。增上緣力。隨感成多。其猶滿月流影。非一。八或云。佛有眾多音聲。一切眾生所有言音。莫非如來法輪聲攝。但以無礙。一即一切。一切即一。故大經云。一切眾生語言。

法一音演說盡無餘。九大師云言一音者乃無音  
 也有即非一。諸有體法皆非一。故由佛無音乃曰  
 一音。佛若有音。有音已定。何能應一切音耶。良為  
 無音。故能隨感出種種音。如鐘聲等。隨擊大小佛  
 音自一。聽者聞多。隨類各各自心現。故無有自心  
 親取他境。經說自心還取自心。處處皆說唯心義。  
 故以此無音之音。普應皆一。色聲功能。於理無違。  
 十文一音即一切音。一切音即一音。若非一即一  
 切者。佛演一音。眾生不能各各領解。又若非一切  
 即一音者。如來一音即不能普備也。良以一多相

即故佛演一音即普備也。一切眾生皆有領解。

△疏次二句轉法輪時第十一一句所轉法輪末後  
 一句能攝方便。

鈔次二句轉時者。文有三世之言。故判為時。意在  
 會地經第三節。彼經即以八相成道為轉法輪時。  
 疏能攝方便者。彼經第三節也。彼於八相文次後  
 云。皆悉往詣親近供養。為眾上首。受行正法。釋曰。  
 供養則集功德方便。上首下則集智慧方便。此二  
 助菩提法。故云方便也。今云我深智力。普能入正  
 同彼也。普入即皆悉往詣也。若不以深智即不能

悉往普入故云深智力也。

△疏入淨土願

經我能深入於未來盡一切劫為一念三世所有一切劫為一念際我皆入我於一念見三世所有一切人師子亦常入佛境界中如幻解脫及威力。

△疏願清淨自土安立正法及能修行諸眾生

鈔第八我能下二偈淨土願彼第七也疏文分二先標釋願名後隨文配釋前中又二先正釋願名後會通具闕今初文中由有清淨自土等言此須明三土今依諸論略釋名義於中有二先釋總名。

後明差別初中總言淨土者世界皎潔名淨即淨可居名土又體離障染名淨依止義邊名土言差別者通論淨土有其三種一常寂光土二常受用土三常變化土言常寂光土者亦名法性土即法身佛所依土也普賢觀經云釋迦牟尼佛名毘盧遮那其佛住處號常寂光謂法界真理不生不滅故名常無相無為故名寂性離垢染體常明照故名光依止義邊名之為土故名常寂光土問法身如來徧一切處何有所依土耶答唯識論云雖此身土體無差別而屬佛法相性異故此但約義強

分以法界理有二種義一者覺照義即名為佛二者與塵沙萬德為依止義即名為土屬佛之處相義名身謂實相之相也屬法之處性義名土即自性身假分身土也二常受用土者有二一自受用二他受用言自受用者謂大圓鏡智淨識所現周圓無際眾寶莊嚴自受用身常依而住名自受用土問何以鏡智現此土耶答以因中有漏第八識能變山河大地器世間等佛位無漏轉成大圓鏡智還能變起自受用土與自受用佛為依止故云鏡智所現也言他受用土者由平等性智為他所

變或小或大展轉精嚴他受用身依止而住問由平等性智現他受土者何故佛地論說鏡智所現耶彼論云諸佛為令地上菩薩受大法樂精進修行於後得智以大悲心鏡智相應淨識之上依菩薩業力如來與作增上緣隨其根宜現清淨土改轉不定據此即由鏡智所現即二論相違也答定不相違所以然者謂他受用佛身之與土皆是無垢第八識自證分中實定果色種子生起蓋以平等性智起大悲心擊發圓鏡智中無漏定果色種子而起十重他受用身土亦須由菩薩善業力感

佛現身如來與作增上緣變起身土令十地菩薩  
 受用卽二論並不相違也言變化土者由成事智  
 大悲願力爲未登地菩薩二乘異生所變或淨或  
 穢大小不同三類化身依之而住問何故化土有  
 淨穢耶答此有二說一由佛本願二由生感變由  
 佛願者如阿彌陀佛往昔曾爲轉輸聖王名無諍  
 念於寶藏佛所發菩提心願取淨土利樂有情今  
 既果滿亦現淨土釋迦牟尼如來時爲大臣名曰  
 寶海願攝穢土成熟有情故今果中亦處穢土言  
 由生感變者由生心淨感變淨土故淨名云欲得

淨土當淨其心等由生心濁故感變穢土如釋迦  
 本願十方佛土所不容受惡業眾生悉生我國又  
 心垢故眾生垢心淨故眾生淨卽其義也餘義極  
 多緣疏文窄不敢繁敘也疏言清淨自土者卽自  
 受用土如淨名云欲得淨土當淨其心等也安立  
 下卽他受用土如淨名云直心是菩薩淨土菩薩  
 成佛時不誚眾生來生其國等也

△疏略無淨土之言以影在後段故而具淨土七種  
 淨義

鈔七種淨義者論判彼淨土願中爲七種淨今疏

全依但次第少差耳亦不須會之

△疏初偈卽同體淨以同法性故令一多互相卽入  
 鈔同體淨至卽入者彼經云願一切國土入一國  
 土一國土入一切國土彼釋全是此疏文也既同  
 法性性則融之故使一多相卽相入相卽者約體  
 以明一卽一切一切卽一則諸法相卽自在門也  
 相入者約用以明一入一切一切入一則一多相  
 容不同門也疏卽入二字以攝十玄門之一門也  
 言十玄門者準清涼國師四十二策問中具以法  
 喻明之問云竊聞華嚴深義謂之十玄請列其名

略申其義答云十表無盡。一造玄隨舉一法卽  
 具斯十謂一同時具足相應門如大海一滴含百  
 川味二廣狹自在無礙門如徑尺之鏡見千里之  
 影三多相容不同門若一室千燈光光涉入四  
 諸法相卽自在門如金與金色二不相離五祕密  
 隱顯俱成門如片月澄空晦明相並六微細相容  
 安立門如琉璃瓶盛多芥子七因陀羅網境界門  
 若兩鏡互照傳耀相寫遞出無窮八託事顯法生  
 解門如立象豎臂觸目皆道九十世隔法異成門  
 如一夕之夢翔飛百年十主伴圓明具德門如北

辰所居眾星同拱。十無前後舉一全收斯為華嚴不共玄旨餘義如大疏明與金師子章具列也。

△疏今文雖辨念劫圓融意取時中圓融之刹。二有半偈明自在淨。如摩尼珠美惡斯現自在圓通是故文云於一念見舉其佛者顯是佛土。

鈔自在淨者彼經云無量佛土普皆清淨。彼釋全同此疏但加淨穢圓通。故云普皆疏舉其佛者人師子即佛也佛是人中之師子故。

△疏三有一句亦常人佛境界中者即是因淨。

鈔因淨者彼經云普入廣大諸佛境界。彼釋亦同

此疏也

△疏因有二種。一者生因謂六度等。如淨名說。

鈔謂六度等如淨名說者即佛國品初標云寶積眾生之類是菩薩佛土所以者何。菩薩隨所化眾生而取佛土。乃至云布施是菩薩淨土。菩薩成佛時。一切能捨眾生來生其國。一也。持戒是菩薩淨土。菩薩成佛時。行十善道滿願眾生來生其國。二也。忍辱是菩薩淨土。菩薩成佛時。三十二相莊嚴眾生來生其國。三也。精進是菩薩淨土。菩薩成佛時。勤修一切功德。眾生來生其國。四也。禪定是菩

薩淨土菩薩成佛時攝心不亂眾生來生其國五也。智慧是菩薩淨土菩薩成佛時正定眾生來生其國六也。

△疏二者依因此復有二。一鏡智淨識為土所依。二後智通慧為土所依。

鈔鏡智淨識為土所依者。總論佛智有其四種。一大圓鏡智。二平等性智。三妙觀察智。四成所作智。問何名大圓鏡智。答從喻為名。謂此智性淨圓明。能鑒照萬物。故名大圓鏡智。即一切有情。心行差別。品類各異。及菩薩影像。三世諸佛之影像。乃至

五趣影像。若事若理。及有為無為。萬德無不朗鑒。悉於中現。故名大圓鏡智。即猶如大圓鏡。能照萬物也。故唯識論云。大圓鏡智相應心品。純淨圓德。現種依持。能現能生。身土智影。無間無斷。窮未來際。如大圓鏡。現灰色像。通持業及分取。他名有財。二釋也。言平等性智者。平謂均。平等即齊等。謂緣一切境時。自他平等。以第七識在因位時。執我執法。有高有下。起不平等。今成無礙。二執已除。自他平等。即約境得名也。故唯識論云。二平等性智相應心品。謂此心品。觀一切法。自他有情。悉皆平等。

也言妙觀察智者謂神用無方稱之爲妙具緣諸  
法自相共相等名爲觀察決斷無疑名之爲智謂  
此心品現通朗鑒說法利樂故名妙觀察智卽從  
用得名也故唯識論云妙觀察智相應心品謂此  
心品善觀諸法自相共相無礙而轉於大眾會能  
現無邊作用差別皆得自在兩大法雨斷一切疑  
網令諸有情皆獲利樂也言成所作智者亦名成  
事智謂能成辦所作利樂有情之事名成所作智  
卽從境及用得名也故唯識論云成所作智相應  
心品謂此心品爲欲利樂諸有情故普於十方示

780

現種種變化三業成本願力所應作事也此之四  
智唯佛具有轉八識而成卽轉第八識成大圓鏡  
智轉第七識成平等性智轉第六識成妙觀察智  
轉前五識成成所作智問既有八識如何轉成四  
智等答理實合轉成八智以前五名同故但立四  
開亦無失皆是決斷爲義總取別境慧及同時意  
二十一法爲體也問八識是心王慧是心所如何  
轉心王卻爲心所耶答言轉者但轉心所中慧成  
智非轉識體也謂因中識強智劣但言八識卽攝  
諸心所皆在其中若至果中卽智強識劣但言四

781

智卽總攝八識皆在其中也卽各轉自識相應之  
 慧也問若因中前七識有相應慧至果可言轉第  
 八旣因中無至果如何轉答第八因中雖無有漏  
 慧相應至果卽從無漏鏡智種子中生現行亦無  
 過失也因疏中云鏡智淨識爲土所依鏡智卽四  
 智中大圓鏡智因茲略釋四智也此疏中言鏡智  
 淨識爲土所依者唯識論云大圓鏡智相應心品  
 謂此心品離諸分別所緣行相微細難知不忘不  
 愚一切境相性相清淨離諸障染純淨圓明現種  
 依持能現能生身土智影無間無斷窮未來際如

782

大圓鏡現眾色像言離諸分別者準佛地論云離  
 我我所執一切所取能取分別所緣行相微細難  
 知者說境及行相二皆叵測微細不忘者恆現前  
 義由此故如來成就無忘失法不愚者不迷昧義  
 由此故如來名一切種智及一切種妙智性相清  
 淨者自性增明名性相清淨純淨圓明者無雜名  
 純離過名淨圓者滿也又純簡因中劣無漏淨簡  
 一切有漏圓簡二乘無學功德現種依持者與純  
 淨等現行功德作所依止起功德故與純淨等種  
 子作能持持功能種故能現能生身土智影者卽

783

能現身土三智之影無間無斷盡未來際者於一切時能現一切處影故不斷絕於一身上現一切影也。如大圓鏡現眾色像者。佛地經云如來圓鏡眾像影現依佛智鏡諸處境現眾像影現皆平等故故以為喻。今言為土所依者即說鏡智淨識與現行功德為依止也。據此且約攝境從心明受用變化二土所依若攝相歸性即須以真如為所依也。言後智通慧等者後智即後得智也。簡非根本智也以根本智唯內證故若現身現土皆是後得智也。然此通說三土所依雖身土種子在第八識

中而現身現土要假諸智為能擊發自受用土鏡智後得他受用土平等後得變化土者即成所作此唯後得各由後智擊發鏡智淨識內種子發生現行故也。言通慧者即神通智慧也依此通慧現身現土故以此為身土所依。佛地唯識據本末說別佛地論中三土皆從鏡智現唯識論中諸智不同若作此和會即不相異也。

△疏此二皆是諸佛境界。又境界者即是相淨。謂七珍等第八一句攝於三淨。謂四以如幻二字即是果淨。果亦有二一所生果即是相淨。略在境界廣

則影在後承事中。二示現果臨機示現故云如幻  
五解脫威力即受用淨。謂受用淨土離過成德如  
用香飯得三昧等。今解脫煩惱即是離過道力之  
能即是成德。

鈔如用香飯得三昧等者。淨名經香積品。因日時  
欲至舍利弗念食時。維摩詰令化菩薩往眾香國  
香積如來所。取佛所食之餘。來維摩詰告舍利弗  
云。大眾食已。至菩薩行品。維摩詰文殊及諸大  
眾共詣佛所。阿難聞諸菩薩毛孔之香。問佛。佛語  
阿難。從眾香國取食。食者一切毛孔皆香。若此阿

786

難問維摩詰香氣久如維摩詰言。若聲聞人未入  
正位。食此飯者。得入正位。然後乃消。乃至得無生  
忍。一生補處等。釋曰。入正位得無生忍等。即三昧  
也。

△疏。故十地經云。成就清淨道。六梵本此句無及威  
力字。有眷屬字。即住處眾生淨。人實為嚴故。  
鈔無及威字。有眷屬字者。此句應云如幻解脫眷  
屬力。故判為住處眾生淨也。

△疏。七者相淨已如前說。

鈔相淨已如前說者。即第三因淨句中。指境界二

787

字為相淨也。

△疏九承事願。

經於一毛端極微中出現三世莊嚴刹十方塵刹諸毛端我皆深入而嚴淨所有未來照世燈成道轉法悟羣有究竟佛事示涅槃我皆往詣而親近。

△疏願往詣佛土常見諸佛恆時敬事聽受法故。

鈔第九於一毛下二偈承事願彼第六也。

△疏第八句為總餘皆是別。

鈔第八句為總者往詣親近正是承事故。

△疏初之一偈即承事處初二句通是真實義相互

相涉入如帝網故。

鈔真實義相者彼經有三種相一一切相二真實義相三無量相今即第二也彼經云如帝網差別釋云土土同體不守自性互相涉入故名真實。

△疏就中三世莊嚴刹即一切相淨土體相有差別故。

鈔就中至差別故者就上兩句中取不守自性為一切相淨也彼經云廣大無量麤細亂住倒住正住若入若行若去彼釋後三句云入者攝他人已去則徧於他中行則往來不住。

△疏第三句即無量相謂前二相徧十方故。

鈔第三句即無量相者彼經云十方無量種種不同彼引菩薩藏經云虛空中世界重數多於大千所有微塵但由業力不相障礙一處重重尙爾况復橫周。

△疏其第四句辯能知見故地經云智皆明了現前知見明爲智知非識境故。

鈔辯能知見者以彼科爲兩段一所知即前三種相二能知即此所引兩句是也彼釋云真實義相但可智知餘一切相可現眼見。

△疏梵本云我甚深入莊嚴刹深入有二一智深入二身深入入彼莊嚴刹中承事如來非嚴淨彼若去而字下加刹字理無違矣。

鈔若去而字下加刹字者此句應云我皆深入嚴淨刹也。

△疏第五一句所承事佛所有佛故六七二句即承事時入相故地經中但列土相殊闕此經。

△疏十成正覺願。

經速疾周徧神通力普門徧入大乘力智行普修功德力威神普覆大慈力徧淨莊嚴勝福力無著無依

智慧力。定慧方便諸威力。普能積集菩提力。清淨一切善業力。摧滅一切煩惱力。降伏一切諸魔力。圓滿普賢諸行力。

△疏願與一切眾生同時皆得無上菩提恆作佛事。故文有十二力。前九明業。用後三結因成果。前中九句有其七業。前之六句力字居中。

鈔第十速疾周徧下三偈。成正覺願。彼亦第十也。文分為二。先標釋願名。二隨文配釋於中。二先標舉科。二依次解釋於中。有二先明業。用後結因成果。初中又二先標指料簡。後隨文解釋。今初疏有

七業者。以彼經有兩段。一成菩提體。卽自分已圓。經云於一切世界成阿耨多羅三藐三菩提。二作業。卽運他不息。文有七業。今疏全依彼。但不次耳。故云有其七業也。次第不同。亦不須會力字居中者。以隨義便。且回經文釋之。令顯如初。應云神通力速疾周徧。意云由神力故。得速徧力字在中。義則易見。下五句準知。

△疏初一句卽自在業。以神通力普周徧故。

鈔自在業者。彼經云。以法智通神足。通幻通自在。變化充滿一切法界。

△疏二一句示正覺業不離一毛端處而於一切處入相成道故名普門。

鈔示正覺業至入相成道者彼經云不離一毛端處於一切毛端處悉皆示現初生出家往詣道場成正覺轉法輪入涅槃一切諸佛示化門中多現入相但名目前後稍別義意大同或一昇天相二降母胎三初生四出家五破魔六成正覺七轉法輪八入涅槃相此是大莊嚴經中說也一昇天相者一切諸佛將欲示生說法利物皆須先往兜率天於彼天中壽四千歲為十種自在業一為欲界

諸天子說厭離法二為色界諸天說入出諸禪解脫三昧三人三昧名光明莊嚴常照三千隨機說法眾生聞已生兜率天勤發覺心乃至第十說無量無邊如幻法門徧十方界示現種種形儀事業隨機令喜又為成熟彼天同行天故令其間法發菩提心是昇天相也二降母胎者四千年滿將欲下生現十種事一足下放安樂莊嚴光普照惡趣遇者獲安皆知菩薩將欲出宮二者毫相中放覺悟普照光普照宿世同行菩薩令知下生各興供養乃至第十於隨好中放日明莊嚴光示現菩薩

種種諸業菩薩如是放百萬阿僧祇光明已從兜  
 率天沒下生人間十方菩薩咨嗟相透化作白象  
 降神母胎如大經說處母胎時住離垢藏三昧以  
 三昧力於母胎中現大宮殿種種莊嚴咒率天宮  
 不可為比而令母胎安隱無患菩薩放光如明鏡  
 中見其面像也三初生者先辯初生時後明童子  
 時如大莊嚴經說菩薩處胎滿足十月將欲生時  
 王宮先現三十二瑞爾時聖后以菩薩力知欲誕  
 生初夜詣王說自所願我今欲往龍毘尼園節物  
 芳春林木榮茂堪可遊翫願王排比王聞即許嚴

妙寶鞞莊嚴園內廣備受用令稱所須龍天歌讚  
 四兵防衛與眾姝女同至園中見波叉樹蔚鬱敷  
 榮眾寶嚴持妙香芬馥百千諸天伎樂圍繞即以  
 右手攀樹東枝嚙呻欠去欲天扶持梵釋捧承即  
 於右脇安庠而誕如涅槃說於十方面各行七步  
 步步生華垂光普照地六震動唱言我於一切最  
 為尊貴釋梵諸天咸來親奉又現微笑放百千光  
 事畢還宮父王歡喜多令姝女給侍承奉後明童  
 子時如無量壽經說又現習學書計算數聲明伎  
 巧醫方養生符印及餘博戲擅美過人如莊嚴等

說。父王令於頹順那邊學書算等。太子發問。彼不能酬。乃至與難陀調達擲象射鼓。及餘博戲無能及者。與執仗大臣等。一一比試。無不過人。廣如本行莊嚴等說。此初生竟。四明出家中。先明出家緣。後正明出家。且初謂如悉達太子年十七時。父王為納三妃。一耶輸陀羅。二瞿夷。三瞿比迦。并嬪姝八萬人。菩薩見諸姝女。如白骨。宮殿如丘塚。塌後因四門遊觀。見老病死。悟世非常。捐捨國位。踰城學道。下正明出家者。菩薩將欲出家。先以七夢令父王知。耶輸夢中見二十種可畏之事。菩薩得不

忘念。自憶阿私陀仙當相我時。言若作輪王。主四天下。出家為道。作三界尊。菩薩自思。煩惱曠野。生死河中。若不修行。終難出離。於眠睡後。即呼車匿。被馬去來。車匿聞之。徬徨不已。諸天催促。帝釋開門。四王捧足。釋梵引路。光照無邊。遇者解脫。漸去宮遠。詣大仙林。諸女覺來。不見太子。悲號悶絕。水洒乃甦。即奏王知。聞已大怒。何不謹之。失我愛子。即遣五族大臣。各令一子。尋之承事。尋之不獲。山中而住。菩薩即詣二仙。學求真道。彼仙被問。墮質歸誠。取劍自落紺髮。以衣貿易。袈裟。遣車匿將馬

卻回令白父王知委然後六年苦行為破邪見制  
 伏多心為降外道常為諸天龍鬼神供養令十二  
 洛又天人住三乘路廣如經說五破魔六成道此  
 二相如下究竟果中明七轉法輪八入涅槃此二  
 相如前勸請隨喜中已明也以八相異教文繁廣  
 今緣疏中舉著故略明之

800

△疏合云以大乘力徧普門謂大乘稱理互相即入  
 而普徧故三次三句即說實諦業謂說實諦令物  
 悟故文中通舉說德及益謂一以智行力內滿功  
 德二以大慈力普覆而說故梵本云以智行力功

德滿以大慈力覆一切後句以福德力徧清淨即  
 是自他離障亦說之益

△鈔說實諦業至亦說之益者以彼經此一業中文  
 有兩段一明能說經云得佛境界大智慧力念念  
 隨眾生心示現成佛二明說益經云令得寂滅故  
 此云通舉說德及益意配彼文全備也說德者即  
 彼能說此中初句即彼佛境界智力次句即彼隨  
 機示現成佛後句疏云自他離障即彼令得寂滅  
 之意也

801

△疏四以第六句即證教化業說自所證以化物故

謂以菩提契涅槃理故無所依。梵本云以智慧力無所依。

鈔證教化業至無所依者。彼經云以一三菩提知一切法界。卽涅槃相。釋云。以一極無二之菩提契無差別之性。淨涅槃則不復更滅。說此令物生信。名教化業也。今云智慧力卽彼一三菩提。云無著無依卽彼涅槃相。

△疏五一句種種說法業。具足定慧方便等故。

鈔種種說法業者。彼經云以一音說法令一切眾生心皆歡喜。卽定慧方便也。

△疏六一句不斷佛種業。積集菩提佛種豈斷。

鈔不斷佛種業者。彼經云不入涅槃而不斷菩薩行。

△疏七一句法輪復住業。依大智慧能淨一切諸善根故。

鈔法輪復住業者。彼經云示大智慧地安立一切。法釋曰。唯一事實卽是佛智。能生萬物。故名爲地。而智慧門隨機萬善。名安立一切。前卽涅槃能建大事。此卽於一佛乘分別說三對實施權。故名復住。

△疏後三句結因成果。由內伏煩惱外降諸魔。普賢行圓故成菩提。亦可後三復為三業。以成圓十。八摧滅煩惱業。九降伏魔冤業。十普圓勝因業。上已別說十願竟。

△疏二總結大願二。一總結十願。

經普能嚴淨諸刹海。解脫一切眾生海。善能分別諸法海。能甚深入智慧海。普能清淨諸行海。圓滿一切諸願海。親近供養諸佛海。修行無倦經劫海。三世一切諸如來。最勝菩提諸行願。我皆供養圓滿修。以普賢行悟菩提。

△疏前之八海。結前九願。謂一淨土願。二成熟眾生願。三轉法輪願。四受持願。五修行二利願。六利益願。由願圓故。七有二願。親近二字。即承事願。供養二字。即供養願。諸佛海言。通上二願。八即不離願。同志行故。長時無倦。

鈔不離至無倦者。若離同見同志法緣。眷屬修行。即厭倦也。

△疏後之一偈。成正覺願。以三世因圓。正覺果滿故。

△疏二結歸二聖及攝所餘。歸二聖者。謂普賢文殊。彰行所屬。亦即十成普賢行名法門主。故言攝所

餘者謂餘不說一切大願是故文云一切願海卽  
同地經如是無量百千萬億阿僧祇大願

△疏文二。一偏同普賢。

經一切如來有長子。彼名號曰普賢尊。我今回向諸  
善根。願諸智行悉同彼。願身口意恆清淨。諸行刹土  
亦復然。如是智慧號普賢。願我與彼皆同等。

△疏偏同普賢也。所以同者。普賢行故。稱法界故。言  
長子者。最尊勝。故出現品亦云。誰是如來法長子  
故。

鈔出現品云。長子者。卽此品初。如來放出現光。逮

世界已入如來性起妙德菩薩頂。便請出現之法  
末偈云。誰是大仙深境界。而能真實具開演。誰是  
如來法長子。世間尊導願顯示。

△疏若表法界者。既表法界。先萬物生無過此。故如  
有偈云。普賢真身徧法界。能爲世間自在主。無始  
無終無生滅。性相常住等虛空。既無有始。卽是長  
義不捨因行。故爲佛子。

鈔既表法界。至故爲佛子者。三聖觀中。先明二聖  
三重表法。初重普賢表所信法界。卽能生如來藏。  
此是緣起法界。非直指一真法界也。以真法界但

是根本於真界中。就能起諸法。義邊為普賢。能照法界。義邊為文殊。其所信法界。帶能所。故亦屬緣起。第二重理智契合者。即會緣釋歸一真法界也。故諸法相生。千差萬別。莫不皆在能生普賢之後。故知能生之主。最初全以真界為體。以合體。故生即無生。由是下偈云。徧法界為世間主。無始無終等。此偈即金剛瑜伽頂經偈也。所徧即一真法界也。能徧即普賢也。世間即一切緣起諸法也。主即最初能生也。無始終者。全同真界也。

△疏但云同等。非但無量阿僧祇願。如法界量無盡。

願行皆悉願同。

△疏二雙同二聖。

經我為徧淨普賢行。文殊師利諸大願。滿彼事業盡無餘。未來際劫恆無倦。我所修行無有量。獲得無量諸功德。安住無量諸行中。了達一切神通力。文殊師利勇猛智。普賢慧行亦復然。我今回向諸善根。隨彼一切常修學。

△疏雙同二聖也。文殊表解解發願。故普賢表行解起行。故願與行分屬二聖。理實皆通。又表理智

一相契合。行願相扶。所以雙同。

鈔故願與行分屬二聖者。此意以解為願而對行也。餘表法等義兼前段普賢等義廣如歸敬請加中具明。

△疏三結歸回向。

經三世諸佛所稱歎。如是最勝諸大願。我今回向諸善根。為得普賢殊勝行。

△疏上來諸願皆屬回向。彌顯三段皆屬回向。

大方廣佛華嚴經普賢行願品別行疏鈔卷第十四